



*Pa haya sosten pa sigui cu trabaonan pa Mama di Cultura*

## Comision Bernadina Growell di bishita cerca rumannan y sobrina di Bernadina

**ORANJESTAD** - Comision Bernadina Growell a haci un bishita na rumannan y subrina di difunto Bernadina cu e meta di haya nan aprobacion pa continua cu trabaonan pa asina engrandece conocimiento di nos pueblo encunto e logronan y cancionnan di nos kerida y inolvidabel mama di cultura q.e.p.d. E rumannan Anna y Irena y subrina Lucia a ricibi e comision y a reuni un rato pa duna e famia relato di e trabaonan cu ya caba a ser ehecuta y esunnan cu lo tin cu ser ehecuta den futuro. E comision a ser representa door di nos kerido Pastoor di Brazil, tambe door di Sra. Lena y Jose Orman, Sr. Chico Harms, Sr. Wim Maduro, Sr. Edwin Maduro, Sr. Persey Jeand'or, Sra. Lilian Besselink, Sr. Lionel, Sra. Lisiy Croes y Sra. Mervin Ras. Sr. Mariano Bermudez y Sra. Marijke Croes a disculpa nan mes pa no por tabata presente. Dia 24 venidero lo tuma luga den Centro di Bario Brazil y segundo festival



Comision Bernadina Growell hunto cu famianan di nos mama di cultura.

dedica na Bernadina y su kerido esposo Cecil Growell. Centro di Bario Brazil lo ta den pleno celebracion en conexion cu nan aniversario y fin di luna di juli lo tin

eleccion di Mosa di Brazil na encargo di Sr. Mariano Bermudez y dia 2 di september e segundo parada cultural den pueblo di Brazil. Intencion di e Comision

ta pa yega na institui un museo di material y artefactonan di e difunto y pa cu esaki lo mester formalisa un ke otro den un statuto cu pronto lo bira realidad.

E presidente, sosteni door di e miembronan di e comision a gradici e famia pa nan sosten na e comision y tambe pa e confianza cu nan tin pa cu e comision por eherce su labor. Alabes e comision a priminti di cumpli cu deseo di Bernadina pa asina sigui engrandece cultura di Aruba.

Na tur cu a duna un aporte na e actividadnan cu ya a tuma luga e comision ta expresa palabra di gratitud y ta spera di sigui haya sosten pa asina realisa mas meta pa sigui cu e proceso di conscientisacion di nos pueblo encunto di Bernadina y pa loke ta trata cultura en general. Pa loke ta e festival di dia 25 di augustus venidero, carchinan lo ta obtenibel cerca miembronan of na Centro di Bario Brazil pa Afl. 15,-. Ya caba a reuni cu cantantenan y agrupacionnan cu lo acompaña e cantantenan y den curso di augustus lo inicia cu training como preparacion pa e festival. □